

疇

人

傳

疇人傳卷第四十一

經筵講官

南書房行走戶部左侍郎兼管國子監算學揚州阮元撰

國朝八

陳厚耀

陳厚耀字泗源號曙峯泰州人也康熙丙戌進士安溪李光地薦厚耀通稱法引

見

上命試以算法繪三角形令求中綫及問弧背尺寸厚耀

劄進稱

旨旋請省親歸里戊子

特命來京己丑五月

駕幸熱河厚耀扈行至密雲

命寫筆算式進呈少頃出

御書筆算問知此法否厚耀對曰

皇上此法精妙極爲簡便臣法臆擬不可用

上諭云朕將教汝汝其細心貫想以待朕問次日又問曰

能測北極出地高下否對曰若將儀器測景長短用檢

八線表可得高度此在春秋分所測則然若其餘節

氣又有加減之異然亦不準何也臣聞地上有隙氣

之差以人目視之有升卑爲高映小爲大之異故以

渾儀測之多不合但在天度數則不差也又問地周
三百六十度依周尺每度二百五十里今尺二百里
地周幾何地徑幾何奏云依周尺地周九萬里今尺
七萬二千里以圍三徑一推之地徑二萬四千里以
密率推之當得地徑二萬二千九百一十八里有奇
上復問地圍出何書對以周髀算經曾言之問何以見其圓
也對曰職方外紀西人言繞地過一周四市皆生齒
所居故知其爲圓且東西測景有時差南北測星有
地差皆與圓形相合故益知其爲圓時厚耀以母年
高不忍離乃就教職得蘇州未踰年

召入南書房

上問測景是何法厚耀求

指示

上曰此法甚精不必用八線表卽以西洋定位法虛擬法寫

示又

命至座旁隨意作兩點于紙上厚耀隨點之

上用規尺畫圖卽得兩點相去幾何之法

上從容論之曰堯典敬授人時乃帝王大事奈何弗講自是

厚耀之學益進嘗

召入至淵鑒齋問難反覆並及天象樂律山川形勢得編觀

御前陳列儀器中有方寸器三十種又

召至西煖閣詢問家世甚詳從

上至熱河命賦泉源石壁詩

授中書科中書傳

旨曰

上道汝學問好授汝京官使汝老母喜也厚耀請定步算諸
書以惠天下

上怡允諭曰汝嘗言梅穀成學甚深今命來京與汝同修算
法穀成至

上問曰汝知陳厚耀否他算法近日精進向曾受教于汝祖

今汝祖若在尙將就正于彼矣乃

命厚耀鼓成並修書于 蒙養齋

賜算法原本算法纂要同文算指嘉量算指幾何原本周易
折中字典西洋儀器金扇松花石硯及瓜果等克什
甚多癸巳修書成

特授翰林院編修甲午丁內艱

命賜帑銀着江南織造經紀其喪喪畢

晉國子監司業擢左諭德兼翰林院修撰戊戌會試充同考官
己亥告疾以原官致仕所著天文秬算書甚夥有
春秋長秬十卷爲補杜預長秬而作其凡有四一曰

秣證備引漢晉隋唐宋元諸史志及朱載堉秣書諸說以証推步之異又引春秋屬辭杜預論日月差謬一條爲注疏所無大衍秣議春秋秣考一條亦唐志所未錄尤足以資考證二曰古術古以十九年爲一章一章之首推合周術正月朔冬至前列算數後以春秋十二公紀年橫列爲四章縱列十二公積而成表以求術元三曰秣編舉春秋二百四十二年一一推其朔閏及月之大小而以經傳干支爲證佐皆述杜預之說而考辨之四曰秣存以古術推隱公元年正月庚戌朔杜預長秣則爲辛巳朔乃古術所推之

上年十二月朔謂元年之前失一閏蓋以經傳于支
排次知之厚耀則謂如預之說元年至七年中書日
者雖多不失而與二年八月之庚辰三年十二月之
庚戌四年二月之戊申又不能合且隱公三年二月
己巳朔日食桓公三年七月壬辰朔日食亦皆失之
蓋隱公元年以前非失一閏乃多一閏因退一月就
之定隱公元年正月爲庚辰朔較長秌實退兩月推
至僖公五年止以下朔閏因一一與杜術相符故不
復續載焉蓋厚耀精于秌法所推較杜預爲密于考
證之學尤爲有裨治春秋者不可少此編矣又算術

尖堆除率三十六倚壁堆除率十八厚耀論之曰尖堆得圓倉三之一故圓率用十二此用三十六其比例爲三十六與十二若三與一也倚壁堆是尖堆之半其除率宜倍三十六作七十二而乃用十八者以半圓周自乘只得全圓自乘四分之一也故以四除七十二爲十八又環田有內外周併及田積問諸數者舊術以田積爲實內外周併數半之爲法除實得徑用徑自乘以減折半數餘爲內周以內周減併數餘爲外周厚耀論之曰用徑自乘句有弊當用六因徑得十八爲較以減周總折半而得內周內周減總

而得外周皆深于算學之言也壬寅春卒年七十有

五

欽定四庫全書總目春秋長孫增刪算法統宗陳氏家譜召對紀言

論曰吾鄉通天文算法之學者國初以來以泗源

先生爲第一焦君里堂循曰曙峯以

聖天子爲師故其所得精奧異人方其引

見時諄諄不倦何其遇之隆也世之談算法者動推梅氏敬

觀

聖祖諭梅穀成數語千秋定論可不朽矣郡志載曙峯所著

孔子家語注左傳分類禮記分類戰國異辭十七史

正譌諸書蓋已久亡今存春秋世俗譜一卷春秋長

秣十卷乃左傳分類中之二種也焦君與余同里湛深經術而尤善爲算會通中西折衷至當著有里堂學算記十六卷泗源先生之學可引而弗替矣

惠士奇

惠士奇字天牧一字仲孺蘇州府吳縣人也康熙戊子舉鄉試第一明年成進士官至翰林院侍讀學士乾隆四年卒年七十一所著有交食舉隅二卷言測日食者先求食限食必在兩交去交近則食遠則否有入食限而不食者未有不入食限而食者也古法不能定朔故日食或在晦說者謂日之食晦朔之間

月之食惟在望此知二五而不知十也日月有平行有實行有視行日月之食亦有實食有視食實食者日月在天相揜之實度視食者人在地所見之初虧食甚復圓也古術或知求實行莫知求視行皆知求平朔莫知求實朔故不能定朔者以此七政有高卑故有恒星天有五星天有日天有月天古人以恒星最高遂指恒星爲天體新法于恒星天之外又有宗動天合于九重之數宗動者七政之所同宗也沈括謂日月星辰之行不相觸者氣而已此不知秣象者也如日月有氣而無體則月焉能揜日哉日高而月

下五星亦有高下高下既殊又焉能相觸乎春秋曰
有食之既既者有繼之辭非盡也新法謂之金錢食
日大月小月不能盡揜日光故全食之時其中闕然
而光溢于外狀若金錢也晚年自號半農居士鄉人
因其齋名稱紅豆先生

潛研堂
文集

論曰惠氏世傳漢學今世學者皆宗之蓋儒林之選
也紅豆以律呂象數研究者稀因潛心二事著琴笛
理數考以明律交食舉隅以明推步觀其以金錢食
解春秋食既辨沈括日月有氣無體之說言甚甄明
雖專門名家無以過之也

陳訐

陳訐字言揚海寧人也由貢生官淳安縣學教諭著句股引蒙五卷其凡例言六藝數居其一句股又九章之一古周髀積畀今三角八線皆句股法也但不得其門每多望洋是編如蒙童初識之無握管作文或析其數或明其理爲入門之始故名句股引蒙又有句股述二卷自序略言余獲侍梨洲黃先生門下受籌算開方因著開方發明後因暇請卒業句股先生曰句三股四弦五此大較也古來鉅公大儒從事於實學者多究心焉可弗講乎余退而讀荆川句股

論幾不可以句伏而思之知空中之理非數不顯空中之數非理不明忽若有悟因述爲句服書句服引蒙句服述

陳世仁

陳世仁海寧人也康熙乙未進士著少廣補遺一卷專明垛積之法凡十二類一曰平尖二曰立尖三曰倍尖四曰方尖五曰再乘六曰抽奇平尖七曰抽偶平尖八曰抽偶數立尖九曰抽奇數立尖十曰抽奇偶數方尖十一曰抽偶再乘尖十二曰抽奇再乘尖

少廣補遺

論曰垛積之術不見于九章沈括夢溪筆談云算術求積尺之法如芻朮芻童方池冥谷塹堵鼈臙圓錐陽馬之類物形備矣獨未有積隙一術所謂積隙卽是垛積蓋其法實始於括耳芻朮芻童之等並具九章商功篇然則垛積之術乃商功之流而以爲少廣者近代算家之陋也世仁詳人之所不詳其用心有足尙已

莊亨陽

莊亨陽字元仲南靖人也康熙戊戌進士官至淮徐海道亨陽自部曹出董河防於高深測量之宜隨事

推究因筆之於書其後人取遺稿裒輯爲書八卷名曰莊氏算學其書首載梅勿菴開方法次日幾何原本舉要次日句股測量及堆積差分諸雜法次各體求積法次日中西筆算次日比例十法次又雜載各體形及測望之法末日七政經緯乃推步七政法也

莊氏
算學

顧長發

顧長發字君源江蘇人也著圍徑真旨一書論圓周圍徑古無定率有高捷者剪紙爲積補換方圓得窺梗概而不得周數又謂甄鸞祖沖之邢雲路湯若望

諸人所定周徑皆未密合因剏爲定率徑一者周三

一二五謂之智術

欽定四庫全書總目

論曰長發所稱智術與袁士龍所用之率正同邢雲路以三一二六爲周率已失之弱而又減雲路率千分之一則其弱彌甚矣

屠文漪

屠文漪字純洲松江人也著九章錄要十二卷言古九章其書不傳特據所見近世之書芟其繁謬補其缺遺以意隸之又言衰分盈朒方程之外更有借徵之法蓋借衰原于衰分疊借原于盈朒而觸類而通

之可以窮難知之數此九章法外之巧也故以次九

章之後

九章錄要

論曰文漪之于算術蓋程大位之流所著九章要錄亦與統宗相類惟少廣篇中有開方求命分密法一條謂命分還原必臚于原實若不復加隅又必盈于原實更有法開之令盈于原實之數甚微則其法爲密斯則可已不已未達深旨者也蓋開方命分母數爲方面西人所謂線也子數爲昇積西人所謂面也二者如曲線直線之終古不能相通開方而有命分止就其相近之數言之本無還原不盈臚之理且九

章云不可開者以面命之然則古人開方并無命分法也

邵昂霄

邵昂霄字麗寰餘姚人也拔貢生乾隆元年薦博學鴻詞以漢晉以來天官家言及歐羅巴之說參以已論爲萬青樓圖編十六卷分爲十四目曰天體曰儀象曰宮度曰二曜曰五緯曰雲氣曰輝氣曰經星曰秣案曰秣理曰秣數曰測景曰測時曰定時又創爲量天景尺及漏梳諸法

欽定四庫全書總目

許伯政

許伯政字惠棠巴陵人也乾隆壬戌進士官山東道
監察御史著全史日至源流三十二卷其說以爲天
周宜用三百六十度日法宜用九十六刻凡二百一
十六年恒星東行三度歲實亦減二十秒如是一百
二十回爲一運以運首所值日名甲子壬子庚子戊
子丙子爲次五運爲一元元首甲子年甲子月甲子
日甲子時正初刻一分內一秒冬至其歲實爲三百
六十五日二時七刻十四分十秒此天行之始數也
依法遞推上起壬子運一下迄壬子運三十每歲求
其冬至之日其壬子運三十之一百一十六年癸未

當明崇禎十六年閏歲而明亡故終於此

欽定四庫全書

總目全史
日至源流

論曰邵康節皇極經世元會運世之說出於臆造非
儒者所宜言也其所謂數學亦道其所道非周官保
氏之法也伯政乃以元會運世附合

御製考成之法誤矣其書又謂日在高卑二日平行實行適
等然則伯政於推步之學蓋稍涉大端而已

余熙

余熙字晉齋桐城人也著八線測表圖說一卷發明
句股和較割圓八線六宗三要諸法

欽定四庫全書總目

顧琮

顧琮字用方滿洲人也官吏部尙書雍正八年六月朔日食第谷舊法微有差以監臣西洋人戴進賢所用新法校之纖微密合

世宗皇帝因命進賢修日躔月離二表續於考成之後然有表無說亦無推算之法琮恐久而失傳乾隆二年奏請以梅穀成爲總裁何國宗爲副總同進賢等增修表解圖說其法以雍正癸卯冬至次日子正爲元太陽日平行三千五百四十八秒小餘三二九零八九七氣應三十二日一二二五四最卑每歲平行六十

二秒小餘九九七五最卑應八度七分三十二秒二
十二微太陰日平行四萬七千四百三十五秒小餘
零二三四零八六平行應五宮二十六度二十七分
四十八秒五十三微最高日平行四百一秒小餘零
七零二二六最卑應八宮一度一十五分四十五秒
三十八微正交日平行一百九十秒小餘六三八六
三正交應五宮二十二度五十七分三十七秒三十
三微與舊法異者大端有三一太陽地半徑差舊定
爲三分今測止十秒一清蒙氣差舊定地平上三十
四分高四十五度止五秒今測地平上三十二分高

四十五度尙有五十九秒一日月五星本天舊爲平
圓今爲橢圓越六年書成凡十卷卽

御定秌象考成後編也

御定考成後編
欽定四庫全書總目

論曰推步之術由太初以迄大統雖疏密殊科而驗
以實象終多違舛我

聖祖仁皇帝御定考成上下編集古今之大成錄中西之要
術固已立萬年步算之準定百世增修之法矣我

高宗純皇帝法

祖敬

天協時正日

御定考成後編復推闡無餘纖微曲盡觀臺儀象用在璇璣
回部里差亦分經緯紀年垂於無疆正朔班乎累譯
蓋自生民以來未有如

本朝之得天者也

何國宗

何國宗字翰如順天府大興縣人也何氏世業天文
故國宗以算學受知

聖祖仁皇帝欽賜進士入翰林官至禮部尙書嘗預修

御定考成上下編

御定數理精蘊

御定考成後編

御定儀象考成

皇朝文獻通考象緯攷諸書乾隆二十年準噶爾蕩平
奉

命出塞測定東西南北里差奏準載入時憲書一例頒發先
是康熙年間實測各直省及諸蒙古之高度偏度京
師北極高三十九度五十五分盛京高四十一度五
十一分山西高三十七度五十三分三十秒朝鮮高
三十七度三十九分十五秒山東高三十六度四十
五分二十四秒河南高三十四度五十二分二十六

秒陝西高三十四度十六分江南高三十二度四分
四川高三十度四十一分湖廣高三十度三十四分
四十八秒浙江高三十度十八分二十秒江西高二
十八度三十七分十二秒貴州高二十六度三十分
二十秒福建高二十六度二分二十四秒廣西高二
十五度十三分七秒雲南高二十五度六分廣東高
二十三度十分布龍看布爾嘎蘇泰高四十九度二
十八分厄格塞楞格高四十九度二十七分桑金答
賴湖高四十九度十二分肯武山高四十八度三十
三分克爾倫河巴拉斯城高四十八度五分三十秒

圖拉河韓山高四十七度五十七分十秒喀爾喀河
克勒和邵高四十七度三十四分三十秒杜爾伯特
高四十七度十五分鄂爾昆河厄爾得尼招高四十
六度五十八分十五秒空各衣札布韓河高四十六
度四十二分札賴特高四十六度三十分推河高四
十六度二十九分二十秒科爾沁高四十六度十七
分郭爾羅斯高四十五度三十分阿錄科爾沁高四
十五度三十分翁機河高四十五度三十分薩克薩
圖古里克高四十五度二十三分四十五秒烏朱穆
秦高四十四度四十五分蒿齊忒高四十四度六分

古爾班賽堪高四十三度四十八分巴林高四十三度三十分札魯特高四十三度三十分阿霸哈納高四十三度二十三分阿霸核高四十三度二十三分奈曼高四十三度十五分克西克騰高四十三度蘇尼特高四十三度哈密城高四十二度五十三分翁牛特高四十二度三十分敖漢高四十二度十五分喀爾喀高四十一度四十四分四子部落高四十一度四十一分喀喇沁高四十一度三十分毛明安高四十一度十五分吳喇忒高四十度五十二分歸化城高四十度四十九分土默特高四十度四十九分

鄂爾多斯高三十九度三十分阿蘭善山高三十八度三十分盛京偏於京師東七度十五分浙江偏東三度四十一分二十四秒福建偏東二度五十九分江南偏東二度十八分山東偏東二度十五分江西偏西三十七分河南偏西一度五十六分湖廣偏西二度十七分廣東偏西二度三十三分十五秒山西偏西三度五十七分四十二秒廣西偏西六度十四分四十秒陝西偏西七度三十三分四十秒貴州偏西九度五十二分四十秒四川偏西十二度十六分雲南偏西十三度三十七分朝鮮偏東十度三十分

郭爾羅斯偏東八度十分扎賴特偏東七度四十五分杜爾伯特偏東六度十分扎魯特偏東五度奈曼偏東五度科爾沁偏東四度三十分敖漢偏東四度阿祿科爾沁偏東三度五十分喀爾喀河克勒和邵偏東二度四十六分巴林偏東二度十四分喀喇沁偏東二度翁牛特偏東二度烏朱穆秦偏東一度十分克西克騰偏東一度十分蒿齊忒偏東三十分阿霸哈納偏東二十八分阿霸亥偏東二十八分蘇尼特偏西一度二十八分克爾倫河巴拉斯城偏西二度五十二分四子部落偏西四度二十八分歸化城

偏西四度四十八分土默特偏西四度四十八分喀
爾喀偏西五度五十五分毛明安偏西六度九分吳
喇忒偏西六度三十分肯忒山偏西七度三分鄂爾
多斯偏西八度圖拉河韓山偏西九度十二分翁機
河偏西十一度古爾班賽堪偏西十一度布龍看布
爾嘎蘇泰偏西十一度二十二分阿蘭善山偏西十
二度厄格塞楞格偏西十二度二十五分鄂爾昆河
厄爾德尼招偏西十三度五分推河偏西十五度十
五分桑金答賴湖偏西十六度二十分薩克薩圖古
里克偏西十九度三十分空各衣扎布韓河偏西二

十度十二分哈密城偏西二十二度三十二分乾隆
二十二年又奏準東三省北極高度尼布楚五十一
度四十八分黑龍江五十度一分三姓四十七度二
十分白都訥四十五度十有五分吉林四十三度四
十七分東西偏度三姓偏東十有三度二十分黑龍
江偏東十度五十八分吉林偏東十度二十七分白
都訥偏東八度三十七分尼布楚偏西十有七分各
蒙古部落北極度哈薩克四十七度三十分塔爾
巴噶台四十七度齋爾四十五度三十分哈布他克
四十五度波羅他拉四十四度五十分拜他克四十

四度四十三分安齊海四十四度十有三分哈什四
十四度八分伊犁四十三度五十六分穆壘四十三
度四十五分吉穆薩四十三度四十分巴里坤四十
三度三十三分烏魯穆齊四十三度二十七分珠爾
都斯四十三度十有七分土魯番四十三度四分魯
克沁四十二度四十八分烏沙克他爾四十二度十
有六分哈拉沙拉四十二度七分庫爾勒四十一度
四十六分東西偏度巴里坤偏西二十三度哈布他
克偏西二十四度二十六分拜他克偏西二十五度
穆壘偏西二十五度三十六分魯克沁偏西二十六

度十有一分土魯番偏西二十六度四十五分吉穆
薩偏西二十六度五十二分烏魯穆齊偏西二十七
度五十六分烏沙克他爾偏西二十八度二十六分
哈拉沙拉偏西二十九度十有七分庫爾勒偏西二
十九度五十六分塔爾巴噶台偏西三十度珠爾都
斯偏西三十度五十分安齊海偏西三十度五十四
分齋爾偏西三十一度空吉斯偏西三十二度哈什
偏西三十三度波羅他拉偏西三十三度伊犁偏西
三十四度二十分哈薩克偏西三十四度五十分嘉
定錢少詹大昕官翰林時于國宗爲後進國宗問其

善算卽先往拜謂曰今同館諸公談此道者鮮矣因嘆息久之時國宗已年老叩以步算諸術猶津津不倦云

大清會典則例梅氏叢書輯要錢少詹說

論曰國宗以疇官子弟在

蒙養齋與梅文穆公同修算書其所學蓋相埒也方

聖祖時以算法受

知致身通顯者不一人以故習之者衆而明其學者往往匿不告人冀以自見其長蓋祿利之路然矣少詹言國宗與人言算平易而詳盡惟恐人之不知猶有梅徵君之遺風焉可謂不驕不吝矣

丁維烈

丁維烈蘇州府長洲縣人也受業梅文穆公之門文
穆以句股積及股弦和較或句弦和較求句股向無
其法苦思力索知其須用帶縱立方因命維烈別立
御之之法維烈遂造減縱翻積開三乘方法以應文
穆稱其頗能深入載入赤水遺珍維烈又著算法一
卷述西人三率比例法

赤水遺珍

論曰文穆創立句股二術其以句股積及句弦較或
股弦較爲問者見于王孝通輯古算經以爲向無其
法蓋偶未及爾文穆用立方維烈之法乃至三乘其

實按以算理當用立方不得用三乘方也歛縣汪君
孝嬰萊調有句股積有句弦和或股弦和求諸數必
有兩形和積相等而不同式可謂發前人所未發然
則梅氏之術且未得爲通率矣

張永祚

張永祚字景韶號兩湖錢唐人也初爲諸生乾隆二
年二月

詔舉能通知星象者無錫嵇公會筠時以大學士總督閩浙
試永祚策器之薦於

朝授欽天監博士會

詔刊經史華亭張司寇照薦永祚校勘二十二史天文律秭
兩志書成方侯議叙而遽乞假歸仁和杭編修世駿
著漢書疏證嘗就問律秭永祚隨條爲答頗有發明
世駿多用其說卒年六十餘

杭州府志道古堂
文集漢書疏證

王元啟

王元啟字朱賢嘉興人乾隆辛未進士知將樂縣究
心律秭句股之學著書已刻者爲惺齋雜著則史記
正譌漢書正譌在焉其正史記之譌者爲律書一卷
秭書一卷天官書一卷正漢書之譌者爲律秭志分
上下二卷未刻者爲秭法記疑句股衍角度衍九章

雜論而句股衍一書因繁求簡最爲精晰書分甲乙丙三集甲集術原三卷乙集綱要二卷丙集析義四卷甲集首卷通論術原末及開平方法爲句股因積求邊張本二卷專論立方因及平方法三卷專論和數開立方所以盡立方諸數之變乙集兩卷爲相求法百三十二則之綱要丙集四卷卽相求法逐則分析其義專取發明立法之意其總序曰句股弦相求法參以和較凡得七十八則求句股中函數又有羈積之數容員容方容縱方及依弦作底求容方與句股求外方外員之數又有積數與句股和較相求容

方與句股餘數相求之法綜而計之又得二十九則
立表測量得求高求遠求深三則重表亦然其術繁
矣舊算書多簡畧不備詳者又苦錯出無緒嘗試意
爲區別使各以類從先定相求法百十三則甲申秋
仲復理前緒遂一一盡通其故運思布算時比舊法
爲直捷而舊法亦不敢沒附見以資參攷至以中函
積數與弦之所和所較相求而得句股弦之正數其
法爲舊算書所不載今亦竊擬一法以附於後又別
割截弦分兩及補句求股補股求句之法分爲六則
使不成句股之形亦可化而爲句股并載不成句股

求中函積數二則容方容員四則外切員徑一則員
內累求句股六則凡又一十九則以該西術三角之
算兼備剖員之用使學者知周髀一經於術無所不
該後人淺爲涉獵不能旁推交通以盡其變故使西
術得出而爭勝其實西術亦本周髀總無出於折句
爲股之外也又畧例引言曰算家句股一門爲術最
繁非繫指一數以爲布算之準難以虛領其義然如
廣三修四見於經者特其正例正例外變例尤多必
欲正變兼陳則一卷中彼此錯出使閱者耳目數易
轉增煩憤茲特標舉數端以爲畧例并不成句股之

形亦附見焉以盡句股之變以該西術三角之算又
附答友問句股書曰欲求句股必先學開方法方有
正方縱方之異縱方則以修廣之和較數開之其次
則求四率比例有三率求四率之法有二率求三率
之法又有一率求三率之法知此卽可以求句股弦
各無零數之法以三率之中率爲主倍中率爲股首
末二率相減爲句相加爲弦依此衍之得句股畧例
十數則然後以句股弦爲正數兩數相加爲和數相
減爲較數又有弦與句股三數加減之和較數弦與
和和弦與較和三數相加之和數也弦與較較弦與

和較三數相減之較數也三數相加減今名之爲兼
三和較凡正數和較之數各三兼三和較數各二共
十三數十三數中隨舉兩數即可求句股弦全數凡
得相求法九十四則而其中容方容員及截弦分兩
與夫立表測量又有單表重表之法猶不與焉其次
則求截弦分兩之法是爲一句股分兩句股之術一
句股分兩句股卽可以知不成句股亦可以分兩句
股不成句股分兩句股卽西法三角算之所由名今
則總以句股槩之其法取大小兩句股形小股與大
句同數者合爲一形卽爲不成句股之形分之爲兩

則所謂中垂線者卽小矩之股大矩之句以此衍之
又得不成句股略例二十餘則於此求之又得合形
分兩削形求全二法合形分兩則有正合形截偶分
兩反合形截中分兩偏合形截邊分兩之法削形求
全則有削去正矩削去偏矩之殊偏矩中又有淺削
深削之分知此則平句股之學盡此矣凡此雖本舊
法而分條析目及入手前後之次悉出新意其標題
名目及運思布算多有不循其舊自以臆定者更有
舊法所不載而以意補入者承下問諄諄不敢自閤
其愚輒粗舉其大畧如此嘉定錢唐跋其書曰開方

句股之法搦始於九章周髀二經自後算學家遞相
推衍至乎梅勿庵之少廣拾遺句股闡微而幾無餘
蘊矣惺齋先生尙以舊術爲繁也更立簡法著書若
千卷先以開方究其原繼於句股窮其變以開方爲
句股所取資也統名之曰句股衍余聞先生論學以
程朱爲宗於文則法韓歐諸大家著書數十種皆粲
然可傳算特其游藝之一耳而猶神明變化若此先
生自言曰我無他長惟好學深思心知其意而已矣
於乎此豈今人之所及也哉余比者考求律呂若審
率方圓周徑未免乎比例之煩也竊自搦法以十倍

徑積爲周積十分周積之一爲徑積又以圓積自乘而十六乘之則十分一爲方積之自乘方積自乘而十六除之復十倍之爲圓積之自乘由是以得周徑方圓也不過開方而已其數視密率稍異而驗之器物則似較密焉惜乎先生已歸道山不獲面質其是非因讀先生之書附識於後

惺齋雜著
句股衍

時人傳卷第四十一

經筵講官

南書房行走戶部左侍郎兼管國子監算學揭帖院元

國朝九

江永

江永字慎修婺源人也讀梅文鼎書有所發明作數學八卷一曰數學補論文鼎疑問已爲術法疏通源流指示箋與永別有觸悟隨筆識之或說於本書之外或譯於本書之中二曰歲實消長辨歲實消長前人多論之者文鼎大約主授時而亦疑其百年消長一分以乘距算其數驟變殊覺不倫又謂今現行之

歲實稍大于授時其爲復長亦似有據因爲高衝近冬至而歲餘漸消過冬至而復漸長之說蓋存此以俟後學之深思永別爲之說謂平歲實本無消長而消長之故在高衝之行與小輪之改兩歲節氣相距近高衝者歲稍贏近最高者稍朒猶定朔定望定弦之不能均惟逐節氣算其時刻分秒而消長勿論也三曰恒氣註術辨文鼎嘗舉康熙己未以後歷年高行以及四正相距時日別爲一卷而云西法最高卑之點在兩至後數度歲歲東移故雖冬至亦有加減不得以恒爲定而疑問補等書謂當如舊法之恒氣

註術永謂冬至既不得以恒爲定則諸節氣亦當用
定不可用恒四曰冬至權度文鼎作春秋以來冬至
攷各以本法詳衍算術雖明而未有折衷永因文鼎
所攷定者用實法推算有不合者斷其術誤史誤五
曰七政衍文鼎論七政小輪之動由本天之動七政
之動由小輪之動永據秣象考成五星有三小輪而
月更有次均輪乃以七政各輪之左右旋與其帶動
自動不動之異本文鼎說一一衍之六曰金水發微
文鼎五星紀要論金水左右旋猶仍舊說後因門人
劉允恭悟得金水自有歲輪而伏見輪乃其繞日圓

象因詳爲之說發前人所未發永再三思之繪圖試
之謂卽此一事文鼎已大有功於天學乃爲此卷以
發其覆七曰中西合法擬草徐光啟鎔西人之精算
入大統之型模正朔閏月從中不從西定氣整度從
西不從中然因用定氣遂以交中氣時刻爲太陽過
宮舉中法十二次之名繫之而西法十二星象亦時
用之於表此則旣非中法復非西法實可疑之端文
鼎疑問補已言之又整度一事當參酌者亦其一端
永以此二事擬數表明仍以文鼎之說冠于卷首入
曰算賡永以文鼎論算極詳觀玩之餘有得輒筆之

又續數學一卷曰正弧三角疏義分支列目以補算
牘所未盡是書初名翼梅同郡戴震傳永之學復爲
訂定改今名所著又有推步法解五卷乾隆二十七
年卒年八十二後震攜永書人都無錫秦尙書蕙田
見而奇之撰五禮通考摭其說入觀象授時一類而
推步法解則載其全書焉數學五禮通
攷戴氏遺書
論曰慎修專力西學推崇甚至故於西人作法本原
發揮殆無遺蘊然守一家言以推崇之故并護其所
短恒氣注術辨專申西說以難梅氏蓋猶不足爲定
論也

戴震

戴震字東原休寧人也乾隆壬午舉人壬辰歲

詔開四庫館震以薦入館充校理

命與會試中式者同赴廷對

欽賜翰林院庶吉士未及散館而卒年五十有五西法三角八綫卽古之勾股弧矢自西學盛行而古法轉昧取梅文鼎所著三角法要舉塹堵測量環中黍尺三書之法易以新名飾以古義作勾股割圓記三篇言因周髀首章之言衍而極之以備步算之大全補六藝之逸簡凡爲圖五十有五爲術四十有九記二千四

百一十七字上篇曰割圓之法中其圓而觚分之截
圓周爲弧背繩弧背之兩端曰弦值弧與弦之半曰
矢弧矢之內成相等之句股二半弧弦爲句減矢於
圓半徑餘爲股繩句股之兩端曰徑隅亦曰弦句股
之弦適圓半徑也方圓之周徑信其周以爲袤以徑
爲廣其冪咸四倍於方圓之冪圓之內函方其內復
函圓則內圓適外圓之半方之內函圓其內復函方
則內方適外方之半句股之數由斯起矣句股弦三
矩方之合句與股二方適如弦之大方減矢於圓徑
餘爲股弦和矢恒爲股弦較和較相乘爲句之方減

句於圓半徑餘爲次弧背之矢倍股爲次弧弦減次
弧背之矢於圓徑餘爲句弦和其矢爲句弦較和較
相乘爲股之方方圓相函之體用截圓之周徑而函
句股和較之率四分圓周之一如之規方之四隅而
函圓之周凡四觚如之因方以爲句股函圓之半周
凡三觚如之爲矩以準望凡百分以矩之百分爲圓
半徑自一隅規之其隅設垂綫截一矩之規成半弧
背者二弧外之句謂之矩分引徑隅爲弦謂之徑引
數股適圓半徑也次弧外之股謂之次矩分弦謂之
次引數句適圓半徑也規法九十有六限限四之一

矩之規其限二十有四爲立成以起算積矩函分萬如次矩分而一得過滿百之矩分凡規限半弧背也半弧弦以爲句謂之內矩分其股謂之次內矩分規限倍之爲半弧背曰倍弧規限之半曰分弧矩分以爲句取次半弧背之分弧矩分加於句爲之弦得徑引數圍周六分之其弧弦適圍半徑是故周三徑一者六觚之周也圍半徑爲股半之爲句求其弦句弦較十之是爲十觚之周圍周之外內所成句股弦皆方數也隨徑隅所指割圍周成弧背皆圍限也限同則外內相應句股弦三矩通一爲率外內相應勾股

弦三矩通一爲率斯可以小大互權矣弧之外內其句股弦平行觀之成同限之句股三矢與圓半徑成方冪半之分弧內矩分之方也減次矩分於次引數其較爲分弧之矩分小大兩弧之和較互權也小弧次內矩分以爲弦兩弧和較之內矩分半和爲之句次內矩分半和爲之股小弧內矩分以爲弦兩弧和較之次內矩分半較爲之句內矩分半較爲之股有大弧互權之率若大弧次內矩分以爲弦兩弧和較之內矩分半較爲之句次內矩分半和爲之股大弧內矩分以爲弦兩弧和較之次內矩分半較爲之句

內矩分半和爲之股有小弧互權之率弧之外內句
股弦終於一矩之規方圓之致備矣凡同限互權之
率句股之大恒也句股應矩之方變而三觚不應矩
之方以句股御之截爲句股六而同限者各二三三
交錯是以展轉互權半弧背過一矩之規以減圓半
周而得外弧三觚句於句股截其內三觚一倨於句
股引而截其外所知之距爲弦其對觚之規限內矩
分爲之股所測之距爲弦測知之規限內矩分爲之
股或測知兩距一觚所知之觚所知之兩距旁之則
於圓半周減一觚規限餘爲兩觚規限之和半之爲

半和限兩距之和較與半較限之矩分相應凡矩分
隨數之和較得以相權凡內矩分必兼和較小大相
權也中篇曰渾圓中其圓而規之二規之交循圓半
周而得再交距交四分圓周之一規之翕闕之節也
緣是以爲經謂之經限橫截經限之外謂之緯限經
之內規之謂之經弧緯之內截其規謂之緯弧經緯
之限界其外經緯之弧截其內是爲半弧背者四以
句股御之半弧背之外內矩分平行相應得同限之
句股弦各四古弧矢術之方直儀也儀不具次矩分
之句股徑隅面各一加一於四而五是故參其體兩

其用用也者旁行而觀之也旁行以用於經限則經
弧矩分爲句緯限次內矩分爲之股經弧內矩分爲
句緯弧次內矩分爲之徑隅旁行用於緯限則緯弧
矩分爲句經限次內矩分爲之股緯弧內矩分爲句
經弧次內矩分爲之徑隅旁行用於經弧則經限矩
分爲句緯限經引數爲之股經限內矩分爲句緯弧
徑引數爲之徑隅旁行用於緯弧則緯限矩分爲句
經限徑引數爲之股緯限內矩分爲句徑弧徑引數
爲之徑隅儀之立也爲方四成旁行而得同限之句
股四經限矩分爲句則緯限矩分爲之股經限內矩

分爲句則緯弧矩分爲之股經弧矩分爲句則緯限內距分爲之股經弧內矩分爲句則緯弧內距分爲之股凡句股二十有四爲互求之率五遵古已降推步起日至斯其本法也引而伸之以經限爲節者其二規皆緯也自交已至經弧謂之次緯儀以緯限爲節者其二規皆經也自交已至緯弧謂之次經儀儀各爲半弧背者三成規限之句股徑隅于是命半弧背之外內矩分曰方數句股徑隅規限句股徑隅也者古弧矢術也必以方數句股徑隅御之方數爲典以方出圓立術之通義也次緯儀經弧爲其句限緯

限之次半弧背爲其股限緯弧之次半弧背爲其隅
限規限句股徑隅其外內矩分平行相應得同度方
數句股徑隅各三儀不具次矩分之句股徑隅面各
一加一於三而四旁行觀之股限徑引數爲股則隅
限徑引數爲之徑隅以用於句限句限次內矩分爲
徑隅則隅限次內矩分爲之股以用於股限隅限次
內矩分爲股則句限徑引數爲之徑隅以用於隅限
儀之立也旁行而得同限之方數句股徑隅三爲三
成股限矩分爲股則隅限矩分爲之徑隅句限矩分
爲句則股限內矩分爲之股隅限內矩分爲徑隅則

句限內規分爲之句取節於方直儀之經限以爲其
限凡句股十有八爲互求之率四次經儀亦如之次
緯儀翕闕之節經限也是故有經限互求之率次經
儀翕闕之節緯限也有緯限互求之率距經緯之弧
四分圓周之一規之謂之外規爲總儀凡構綴之規
法五皆四分之以爲其限而交加前卻之分儀半弧
背四合而爲儀者五曰方直儀曰右方儀曰右次方
儀曰左方儀曰左次方儀半弧背三合而爲儀者十
曰次緯儀曰次經儀曰兩緯儀曰兩經儀曰次經緯
度儀儀之句度股度互易則外內矩分各旋而易故

五名而其儀十凡爲儀十有五。是謂一終得方數之
句股徑隅三百弧矢術之正整之就叙矣。下篇曰三
觚非弧矢術之正。以句股弧矢御之。渾圓之規限正
視之中繩側視之隨其高下而羨。惟平視之中規胥
以平寫之。循規限之端。竟半周得圓徑衡截圖徑齊
規限之末。抵外周得規限所爲半弧。弦弧與弦易正
側之勢。以爲平。於是命外周之限分爲其規限凡矢
屬於規限之端。弦屬於規限之末。一從一衡相遇也。
用矢用內矩分準是率。率之四分圓周之一。古推步
法謂之象限。是爲一矩之規率之變也。減兩距於圖

半周用其餘弧爲兩距減對兩距之觚於圓半周用
其外弧爲兩觚內矩分其用之半弧弦也餘一距及
其對觚其用之觚與距也若三觚各以爲渾圓之一
極距觚四分圓周之一規之三規之交成三觚三距
則觚同其距之規限距同其觚之規限前術大小倨
句之體更也後術觚與距之體更也句股相權之大
恒觚之規限內矩分各與對距相應三距爲渾圓之
規限則觚之內矩分與對距之內矩分相應相應而
展轉互權矣所求非對距對觚則截之成規限句股
徑隅者二各視次緯儀之率通之凡內矩分爲半弧

弦其弧背渾圓大規也半弧弦不滿圓半徑者以矢爲樞以半弧弦規之成渾圓之小規衡截正視側視之規側視之規亦截小規而與中圓之大規相應截小規之徑爲大小矢則與中圓大規之徑爲大小矢相應三觚之用兩距和較也所求之觚或所知之觚所知之兩距旁之其觚謂之本觚旁於本觚之右距以平寫之爲平視之規則左距爲側視之規截左距之末成小規而識左距於平距和限較限之矢較半之爲矢半較以爲句小規之半徑爲之徑隅以較限與對本觚之距兩矢較爲句左距側視之規截小規

之徑成大小矢爲之徑隅如是得同限之句股二而
句與徑隅通一爲率凡觚之規度中圍大規也大小
規之半徑及其矢並通一爲率若左距適四分圍周
之一則所成之規適爲中圍大規若左右距相等無
較限則和限之矢半之爲句小規之半徑爲之徑隅
對距之矢爲句小規之大小矢爲之徑隅以觚求距
求對距之矢也以距求觚求本觚規限之大小矢也
是記所謂內矩分卽正弦次內矩分卽餘弦矩分卽
切線次矩分卽餘切徑引數卽割線次引數卽餘割
倨卽鈍角句卽銳角度謂之限角謂之觚邊謂之距

又以環中黍尺用總存兩餘弦相加減用時宜審餘
弦同在半徑不同在半徑震立新法改用兩矢較半
之與以餘弦相加減所得初數同且免詳審加減之
煩又著原象八篇迎日推策記一篇以明推步原象
一曰日循黃道右旋斜絡乎赤道而南北者寒暑之
故也虞夏書以璇機玉衡寫天逸文猶見周髀之書
論語之北辰周髀所謂正北極是爲左旋之極日躔
黃道其極周髀所謂北極璇機環正北極者也月道
之極又環璇機者也是爲右旋之樞璇機之環正北
極而成規也冬至夜漏中起正北極之下日加卯在

正北極左日加午在正北極上日加酉在正北極右
晝夜一周而過一度均分其規位十有二子春分夜
漏中則起正北極之左是爲建卯夏至起正北極之
上是爲建午秋分起正北極之右是爲建酉冬至而
復起於正北極下是爲建子中氣十有二皆中其建
如是終古不變以與日躔黃道相應凡三百六十有
五日小餘不滿四分日之一日發斂一終月道斜交
乎黃道凡二十有七日小餘不滿少半日月遼其道
一終日月之會凡二十有九日小餘過半日以起朔
十二朔凡三百五十有四日小餘不滿四分日之一

而近歲終積其差數置閏月然後時序之從乎日行發斂者以正故堯典曰期三百有六旬有六日以閏月正四時成歲日朏月而月乃有光人自地視之惟於望得見其光之盈朔則日之朏月其光嚮日下民不可得見餘以側見而闕日月之行朔而薄於交道日爲月所揜則日食日高月卑其間相去蓋遠故其食分淺深隨地之方所見者不同望薄交道而月入閭虛則月食張衡靈憲之文曰當日之衝光常不合者蔽於地也是謂閭虛月過則食閭虛之爲地景故食分淺深見者皆同月出入黃道表裏最遠不及六

度日發斂於赤道外內四十餘度之間赤道者中衡也古有分至啓閉謂之八節準以設衡其五衡與外衡內衡發斂所極至也中衡南北之中分也自南斂北入次四衡爲春入次二衡爲夏當其衡啓也自北發南出次二衡爲秋出次四衡爲冬當其衡閉也周髀之七衡六開則準乎中氣十有二外衡冬至內衡夏至中衡春秋分不相變革日之發斂以赤道爲中月之出入以黃道爲中此天所以有寒暑進退成生物之功也日月之贏縮遲疾皆有規法於以見運行之機至動有常是以秊數得而明之凡地之方所近

日下盛陽下行故暑日遠側照則氣寒寒暑之候因地而殊中土值內衡之下已北其外衡之下已南寒暑與中土互易中衡之下兩暑而無寒暑漸退如春秋分乃復南北極下凝陰常寒矣二曰堯典日中星鳥以殷仲春日永星火以正仲夏宵中星虛以殷仲秋日短星昴以正仲冬日夜分暨永短終古不變者也星鳥之屬列星之舉目可見大小有差闊狹有常相距不移徙者也終古不變者因乎地而生里差相距不移徙者以考日躔而生歲差唐虞春分日在胃昴之間故鳥中夏至日在七星故火中火心也秋分

日在氏房之間故虛中冬至日在虛故昴中鳥南陸
蒼龍房心東陸元武虛危北陸昴西陸昴同日西下
必龍角東陞鳥值南虛在極之北四正之位各協其
方然則列星四象辨自羲和仲春初昏不違天部也
夏小正五月初昏大火中協於星火仲夏之文而春
秋傳張耀曰火中而寒暑退謂季冬寒退旦中季夏
暑退昏中也凡星未中見而東陞過中乃西流故幽
詩曰七月流火小正與堯典合春秋傳與詩合星以
紀候者先後一月虞夏日躔所在與周差一次與今
差二次星之見伏昏旦中悉因之而異此其大經也

二十有八舍十有二次周時之文始詳春秋傳婺女
爲元枵維首又曰元枵虛中也據是遞之星紀斗牽
牛也元枵婺女虛危也姬訾之口營室東壁也降婁
奎婁也大梁胃昂也實沈畢觜觿參也鶉首東井與
鬼也鶉火柳七星張也鶉尾翼軫也壽星角亢也大
火氐房心也析木之津尾箕也元枵一曰天竈一曰
顓頊之虛姬訾之口一曰豕韋斗或以建星觜觿以
罰東井與鬼以狼弧營室謂之定柳謂之囓氐謂之
本房謂之駟尾謂之依大水定也烏帑軫也亢氐之
間天根也房農祥也天策在尾旁攝提挾大角南門

在亢之南斗杓是爲招搖當依織女向降婁者也假
恒星識日月之躔逡恒星蓋二萬五千餘年右旋一
終古在赤道外者今迤而入乎赤道內矣古在赤道
內者今迤而出乎赤道外矣星之與衡相值也並古
今殊日發斂一終而成歲於黃道無差數冬至起外
衡仍復底外衡而星則異其所其爲差數也微是謂
歲差故歲功終古不忒而星之見伏昏旦中隨時爲
書以示民千百年然後一易周人以斗牽牛爲紀首
命曰星紀自周而上日月之行不起斗牽牛也然則
十有二次之名蓋周時始定唐虞冬至日在虛元枵

次也今冬至日在箕初析木之津也三曰周官經土
圭之法測土深正日景以求地中日南景短日北景
長取中而得尺有五寸以是求南北之中日東景夕
日西景朝時刻相差比以是求東西之中蓋所謂測
土深者以南北言也聖人南面而聽天下以法天故
南北爲經東西爲緯南北爲深爲輪東西爲廣表景
短長卽南北遠近必測之而得故曰測土深所謂正
日景者以東西言也地中景正日加午東方已過午
後而爲景夕西方尙在午前而爲景朝周髀立晝夜
異處加四時相及之算謂地中與東西相距四分圓

周之一則地中午東方酉西方卯自卯至午自午至酉皆四時也必正其日中之景以審時之相差故曰正日景兼是二者一爲南北里差一爲東西里差測非獨夏至夏至日中景最短及其最長皆以土圭度之古人用是考黃赤二道猶漢已降之考北極高下也土圭之法不惟建王國用之封國必以度地以此知某國或日南日北或日西日東然後可定各地之分至啟閉陰陽大論之文曰地之爲下否乎地爲人之下太虛之中者也馮乎大氣舉之也步算家考北極及月食得地體周七萬二千里環地之周戴天曰

上履地曰下南行近二百里而北極下一度北行近二百里而北極高一度處乎地者無敬側之患何也大氣使然也晝夜永短南北以漸而差南至赤道下南北極與地適平晝夜均無永短北至極下赤道與地適平如帶自春分至秋分爲晝秋分至春分爲夜凡氣朔之時刻漸西則氣朔早漸東則氣朔遲月過閭虛而虧食西見食早東見食遲此地與天相應之大較也地之廣輪隨其方所皆可假天度測之矣四曰洪範五紀一曰歲二曰月三曰日四曰星辰五曰秣數分至啟閉紀於歲者也朔望朏霸紀於月者也

永短昏昕紀於日者也列星見伏昏旦中日纏月逡
紀於星辰者也羸縮經緯終始相差紀於秣數者也
紀於歲者察之日行發斂紀於月者察之日月之會
交道表裏紀於日者察之晝夜刻漏出入里差紀於
星辰者察之十有二次紀於秣數者隨時測驗積微
成著修正而不失屈原賦之文曰圜則九重九重者
自下而上數之月一辰星二太白三日四熒惑五歲
星六填星七恒星八有象之高下止於八並各爲右
旋然則大氣左旋而九與古之治秣者考日月之行
以授時表中星以著候不言五步也漢以降推測滋

繁於是五步之遲疾留退見伏有稽天左旋日月星
隨之而左者晝夜之象也各爲經緯是以知日月星
皆右旋右旋者發斂之軌也日入次二衡而暑盛出
次二衡而暑以漸微日入次二衡而減夏之暑增冬
之寒出次二衡反是是故知日月出入之行可以知
寒暑之所由消息矣日之贏縮月之遲疾五步之益
以留退有規法以知差數日月五步循之而旋也漸
高則距地遠而人視之加小漸下則距地邇而人視
之加大日月五步之規法贏縮之故也一逆一順自
然而成至動有常之機也古寫天之器莫善於璇機

玉衡漢以降失其傳也久可徵而復也爲儀象考識
日躔渾圓而中規之象赤道距規四分圓周之一設
其樞象天極也爲規載之曰子午之規半出於地平
規隨北極高下以察各方之永短昏昕斜絡赤道外
內爲規象黃道距黃道四分圓周之一是爲南北璇
機璇機者黃道極也準赤道爲規法二分之規曰中
衡赤道也冬至之規曰外衡夏至之規曰內衡凡爲
衡者五應一歲之分至啓閉衡百度度六之應晝夜
之漏刻刻七十有二分以知里差經歲三百六十有
五日不滿四分日之一以是爲日躔黃道之度分是

故黃道日也赤道刻也星儀考識昏旦中設其樞以
象星極爲游規而載之以知歲差規設天極焉載於
子午之規以周知一歲婺女爲元枵之維首而周分
十有二次以紀日月之躔離察玉衡以知左旋察璇
機以知右旋天行之大致舉矣自五篇以下文與句
股割圖記大同不具迎日推策記曰日月之盈縮遲
疾步算家積驗於旣往定爲規法日躔黃道其高下
逆順以成盈縮者曰左旋之規中其規屬於黃道循
黃道而右所謂平行者此也凡三百六十五日小餘
不及四分日之一適終其道謂之經歲其周日右旋

之規中其規屬於左旋之規隨之而左歲不及一終積至五十餘年而差及一度日屬於右旋之規隨之而右左旋之規一終右旋之規恒倍之而再終四分左旋之規以爲四限其下半周之半爲盈初上半周之半爲縮初自盈初至盈末日之實體前於平行自縮初至縮末日之實體後於平行也月道其高下之規法以生遲疾者曰左旋之規中其規屬於月道循月道而右凡二十七日近少半日平行終其道其周日右旋之規中其規屬於左旋之規隨之而左不及一終而差數生焉三千二百三十餘日差數之積滿

一周四分左旋之規以爲四限其上半周之半爲遲初下半周之半爲疾初遲初至遲末猶日之縮初縮末也疾初至疾末猶日之盈初盈末也屬於右旋之規者曰附綴之規其周曰次右旋之規與左旋之規恒相切也其周曰次左旋之規月距日一度則次右旋之規其旋也二度次左旋之規亦如之月屬於次左旋之規朔望恒旋而在上下弦恒旋而在上也二十九日過日之半而月與日會是謂朔策月道交於黃道自南而北其交曰中交於是月遶黃道之北謂之陰秣自北而南其交曰正交於是月遶黃道之

南謂之陽秣其入陰秣也已及六度中土測之尙在
日南其入陽秣也尙差六度中土測之已在日南黃
道高於月道故也月之南北行以玉衡界黃道而八
古推步法謂之九道八行其二十七日有奇而月道
一終也二交不復於其所差而西凡一度又幾度之
半自外衡以起差數三十交而值次二衡三十交而
值中衡赤道三十交而值次二衡三十交而值內衡
三十交而復值次二衡如是以底於外衡凡十有八
年過年之半而八行一終月道極之環繞黃極也曰
左旋之規以黃極爲之中曰月道極所屬之規中其

規屬於左旋之規隨之而左十八年過年之半而一終交道之有差數以此月道極所屬之規亦左旋其旋也一月而再終朔望月道極近黃極故月道與黃道相距爲之加邇焉上下弦月道極遠於黃極故月道與黃道相距爲之加遠焉黃道與赤道相距近較數百年間漸差而近雖翕闕之節未昭然明著其故亦猶是也填星歲星熒惑在日之上爲三重太白辰星在日之下爲二重其規法高下逆順以成遲疾畱退者曰左旋之規中其規各屬於其道循其道而右其周曰右旋之規中其規屬於左旋之規隨之而左

填星歲星熒惑太白左旋之規一終右旋之規倍之而再終辰星左旋之規一終右旋之規其旋也再倍之而三終五步之平行終其道也填星凡二十有九年幾年之半歲星幾十有二年熒惑幾二年太白二日二十有四日過日之半辰星過八十有八日左旋之規不及一終而差數生焉星所屬之規中其規屬於右旋之規在日上者三星以日躔相推而遲故星所屬之規右旋在日下者星二以速於日躔故星所屬之規左旋星之見伏環日上下各有定距成環日之規在日上者環日之規類於左旋以就日在日下

者類於右旋以就日也自赤道以會於天極其度開
廣狹殊體自赤道以視日月五步之道其升降正斜
殊勢自地周上至恒星其高下表裏殊觀環地之周
上應天周中其圖是爲地體之小故算之所得中乎
地體測望所得周乎地體而兩者殊數水土之氣蒸
而上浮日月星之度閒以舒下者以升小者以大晝
夜旦夕其爲蒙氣殊變盈縮遲疾至於蒙氣交錯相
差之明著者也若夫靡今靡古莫知紀極譬寸寸度
之至尺則差銖銖權之至兩則差故設器觀象與法
相濟俾差數未覩者仍之差數旣覩者修而正之此

終始相差之無定者也明著者立之法無定者不改
於其法可以治秣矣又著續天文畧三卷文多不載
載其目曰星見伏昏旦中曰列宿十二次曰星象曰
黃道宿度曰七衡六閒曰晷景短長曰北極高下曰
日月五步規法曰儀象曰漏刻或補通志所闕遺或
賡所未及凡占變推步不與焉震在

四庫館分校天文算法書甚夥其海島算經五經算術

二種則震從永樂大典中接拾殘賸集合而成者曲
阜孔公繼涵以震所校周髀算經周髀音義九章算
術九章音義海島算經孫子算經五曹算經夏侯陽

算經張邱建算經五經算術緝古算經數術記遺并
震所撰九章算術補圖策算句股割圓記合而刻之
卽今世所傳算經十書也

戴氏遺書
算經十書

論曰九數爲六藝之一古之小學也自暴秦焚書六
經道湮後世言數者或雜以太一三式占候卦氣之
說由是儒林之實學下與方技同科是可慨已庶常
以天文與地聲音訓詁數大端爲治經之本故所爲
步算諸書類皆以經義潤色縝密簡要準古作者而
又罔羅算氏綴輯遺經以紹前哲用遺來學蓋自有
戴氏天下學者乃不敢輕言算數而其道始尊然則

戴氏之功又豈在宣城下哉

盛百二

盛百二字秦川浙江秀水人也乾隆丙子舉人官山東淄川縣知縣嘗謂羲和之法遭秦火而不傳六天沸騰莫之所從自太初以後踵事增修者七十餘家至此時

御製律秣淵源之書出如披雲見日使千古術士詭秘之說

至今日而無遁其形始知大經大法已畧具於虞書數語之內雖有古今中西之殊而其理莫能外也因著尚書釋天六卷解堯典舜典允征洪範諸節之有

關於秣象者博采諸書而詳疏之其大要以西法爲
宗尚書
釋天

錢塘

錢塘字學淵一字禹美號溉亭太倉州嘉定縣人也
乾隆四十五年舉江南鄉試明年成進士官江寧府
學教授論方圓周徑言算莫難于算圓圓周者圓羈
之本也以方容圓徑同而周異圓周之有圓羈若方
周之有方羈故周異而羈亦異倍其徑者四其羈則
初以爲周者繼以爲羈矣以方周除圓周而十之亦
卽圓之羈也由是定爲方圓之率任所得之爲方爲

圖無不可以推知其所未得而術有古今疏密之不同古術方周四則圓周三是冪亦必方四而圓三也至劉徽注九章推得圓周三一四有奇而去其餘數故徽術算冪亦方四而圓三一四也後人知古術之疏以徽術爲密依而用之雖間有修改要不離此率自予觀之亦未見其密也試度取一物之徑命之爲一則周且至三一六以上矣夫古術泥于陽奇陰偶之說其疏固宜徽術則本之割圓割圓之術有觚有弧矢以算之也有半徑與弦半徑常爲大弦而迭爲句股以求其小弦半徑爲小弦所截成弧矢有弧矢

則半徑不盡半徑不盡則小弦不盡而割圓之以爲
弧者卽小弦也弦直而弧曲合之以爲周非其類矣
周之爲物如環無端割而爲觚必且無盡而割圓不
能無盡也斯則名爲周而實非周也而又不能無所
棄始之開方以求大股也可開而至于無盡也旣以
其不能盡而棄之後之開方以求小弦也亦可開而
至于無盡復以其不能盡而棄之有所棄則非全數
矣微之割圓也止於九十六觚其於股於矢於小弦
固皆曰餘分棄之是以二尺爲方之圓周尙以六分
半有奇爲小弦夫以如環之圓而以六分以上之小

弦九十六之以爲周謂其與圓合體也其孰能信之
是故求圓周者可無割圓也度之亦畧近矣度法絲
毫以下常無象而不可以名則有一術焉更密于度
周而可以相代者曰十倍其徑羈以爲周羈而已我
蓋得之於方方之徑羈卽圓之徑羈也方之周羈猶
圓之周羈也唯以十六爲十是已數皆以十成而權
衡獨以十六卽其理也是故徑羈一則方周羈十六
而圓周羈十徑羈十則方周羈百六十而圓周羈百
是爲周徑之羈異位而同名夫如是則圓羈至十倍
卽周爲徑而十倍其徑以爲周矣是反覆不衰之術

也舊術周羈不足徑羈之十倍故反覆之則必衰衰不衰何足深論顧如方之容圓有舒促何容圓無舒促則無如此術矣是術也可不用比例而得周徑與方圓不出乎乘除進退以開方而已矣求周徑者徑自乘而十乘之卽周之自乘周自乘而十除之卽徑之自乘求方圓者方自乘而十六除之復十乘之卽圓之自乘圓自乘而十六乘之復十除之卽方之自乘所得皆平方開之也舊唯周徑有羈今則方圓之羈又有羈然皆因數以立術非爲術以設數也然則其數幾何曰術在數可不言也以徑一爲例則徑羈

百圓幕千而方幕之幕十萬圓幕之幕六千二百五十是爲徑一則周三一六有奇而方百者圓七九零也立圓立方何如曰亦不過三一六爲圓則六爲方而已矣年五十六卒于江寧官廨所著有淮南王

訓補注三卷

潛研堂文集

論曰圓周徑率自劉徽祖沖之以來雖小有同異大要皆徑一周三一四而已漑亭獨拊爲三一六之率與諸家之說迥殊余攷秦九韶數學九章環田三積術其求周以徑幕進位爲實開方爲圓周求積以徑幕乘周幕十六約之爲實開方爲圓積是九韶亦以

三一六爲圓率與溉亭所勘率正同蓋精思所到闇合古人也江寧談教諭秦今之算學名家曾作一丈徑木板以蔑尺量其周正得三丈一尺六寸奇以爲溉亭之說至當不可易也

李惇

李惇字成裕號孝臣高郵人也乾隆己亥舉鄉試吳子成進士通天文術算象數之學所著有杜氏長林補渾天圖說若干卷卒年五十一

焦里堂李孝臣先生傳

論曰孝臣先生與嘉定錢溉亭齊名於算學深造自得識者爭推之乃歿未二十年其遺書散佚不可復

得昔人云藏之名山傳之其人豈未遇其人耶著作之傳與不傳亦有幸有不幸也

吳烺

吳烺字櫟亭全椒人也官中書通數學著有周髀算經圖注乾隆戊子松江沈大成爲之序曰客有問於余者西法何自昉乎曰周髀何以知其然也曰周髀者蓋天也蓋天之學始立句股句股者西人所謂三角也衡之以爲句縱之以爲股衰而引之以爲弦正而伸之以爲開方是故并之則爲矩環之則爲規圓內容方方內容圓則爲纂積弧矢五寸之矩可以盡

天下之方一圓之規可以盡天下之圓秣家以蓋天
不同於渾天卽揚子雲猶疑之然吾以爲蓋天者渾
天之半渾天者蓋天之全蓋天者自內而觀之渾天
者自外而觀之然觀天必先於察地以太陽之晷景
在地也樹一表而句股之數可得句股之數得而高
深廣遠無遁形矣是周髀之術也蓋嘗稽之考工端
人之爲蓋弓也冶氏之爲戟也磬氏之爲磬也匠人
之置槷也有一不出于是者哉商高之言曰智出於
句句出於矩其言可謂簡而要矣趙爽甄鸞之徒從
而疏解之榮方陳子又踵而述之支離輻輳如鼷鼠

食郊牛之角愈入愈深而愈不可出是故通人無取焉楷亭精于九章以是經之難明也寫之以筆祿而繪以圖皎若列眉剗然若畫井昭昭然若揭日月而行舉千載之難明者一旦豁於目而洞於心豈非愉

快事哉

周髀算經圖注

褚寅亮

褚寅亮字捐升號鶴侶蘇州府長洲縣人也乾隆十六年

召試

欽賜舉人內閣中書官至刑部員外郎長於算術與少詹事

嘉定錢辛楣大昕友善少詹作三統術衍校正刊本
誤字甚多其中月相求六劫之數句六劫當作七劫
推閏餘所在加十得一句加十當作加七皆取寅亮
說也所著有句股廣問三卷

錢少詹說

論曰少詹言乾隆辛未壬申間與鶴侶同寓京師因
共研究算義往覆辨難者累年鶴侶心思精銳遇史
書魯魚一見便能訂其誤謬於句股和較相求諸法
尤極精審惜遺書未經刊行今不審其存乎否矣

屈曾發

屈曾發字省園蘇州府常熟人也著九數通考十三

卷自序言己丑之春得

聖祖仁皇帝御製數理精蘊伏而讀之訂古今之同異集中
西之大成平日之格而不化者一旦渙然冰釋惜薄
海內外窮儒寒畯未獲悉觀全書乃不揣固陋
時所輯重加增改一折衷於數理精蘊學者取而習
之不特古者六藝教人之法可得其旨趣卽我

朝文軌大同制作明備之休亦藉以仰窺萬一矣其書
初名數學精詳休寧戴震爲改今名

九數
通考

龔淪

龔淪字長蘅號易槃蘇州府長洲縣人也乾隆丙午

舉人嘉定錢少詹大昕主講蘇州紫陽書院淪因從
受數學時年已五十餘矣發憤力學無間寒暑家貧
書籍不具從友人家借讀手自抄撮密行細字每歲
恒積二尺許於步算諸法必究其所以然而後已讀
海島算經謂清淵白石術其又術於率不通海島九
問惟此有又術當是後人竄入非劉徽本文李淳風
依數推衍蓋未嘗深思其故也嘉慶四年五月卒年
六十一所著述古適三卷乃句股弧矢之法多以立
天元術入算有前人所未及者余爲序之

論曰龔君余丙午同年友也以垂暮之年究心絕業

是尙尙已毫而好學昔人所難況今人乎余輯疇人傳旨竟聞其下世乃亟錄之以厲世之爲學者

厲之鐸

厲之鐸字寶青錢唐乾隆間嘗游京師考授天文生著有悲緯瑣言一書其書於三角八綫小輪橢圓之說俱能洞見本原其於捫燭扣槃以爲智者又嘗自出巧思製刻漏堽錫爲之運轉自然晷刻相應不爽毫髮觀者莫不絕